



NCMA Cymru a Gofal Plant o 'Ansawdd'

1. Cyflwyniad

1.1 Y cefndir i'r ymchwil

Yn dilyn trafodaethau cyffredinol gyda staff NCMA Cymru yng Nghymru dros y deuddeg mis diwethaf, penderfynodd NCMA Cymru adolygu'r cynlluniau ansawdd presennol sydd ar gael i ofalwyr plant yng Nghymru drwy ein sefydliad. Roedd hyn yn arbennig o berthnasol o ystyried bod cynllun Ansawdd yn Gyntaf NCMA ar fin dod i ben i ymgeiswyr newydd erbyn diwedd 2010, ac o ystyried yr ansicrwydd o ran ein cyllid oddi wrth awdurdodau lleol ar gyfer y flwyddyn ariannol nesaf, yn unol â'r Adolygiad Cynhwysfawr o Wariant gan Lywodraeth Cynulliad Cymru.

Roedd angen gwneud hyn er mwyn

- Sicrhau gwerth am arian i'r rhai sy'n rhoi cyllid i NCMA Cymru
- Sicrhau perthnasedd y cynlluniau ansawdd i ofalwyr plant yng Nghymru
- Sicrhau bod cynlluniau ansawdd yn cyd-fynd â pholisïau Cynulliad Cymru (er enghraifft Gweithredu'r Hawliau, y Strategaeth Tlodi Plant, y Cyfnod Sylfaen, Dechrau'n Deg a Theuluoedd yn Gyntaf)
- Hyrwyddo mynediad at gynllun ansawdd i fwy o ofalwyr plant yng Nghymru, a sicrhau nad yw'r cynllun yn elitaidd nac yn gwahaniaethu.

2 Methodoleg

2.1 Sut gwnaethom ni gyflawni hyn?

Cynhaliwyd ymgynghoriadau â staff, gofalwyr plant, rhanddeiliaid allweddol o awdurdodau lleol, a phlant a'u teuluoedd er mwyn cael amcan o'u barn.

Cynhaliwyd dau ymgynghoriad â staff NCMA Cymru, un yn y gogledd a'r llall yn y de. Roedd y staff nad oeddent wedi gallu dod i'r sesiynau hyn, ond a

oedd yn dymuno cyfrannu, wedi cael cyfle i wneud hynny drwy gyfarfodydd a negeseuon e-bost. Cynhaliwyd cyfarfod gydag aelod staff unigol yn dilyn hyn.

Cynhaliwyd tri ymgynghoriad â staff o awdurdodau lleol Cymru yng Nghaerdydd, yn Llanelli ac ym Mae Colwyn. Daeth 18 o staff o 16 o awdurdodau lleol ledled Cymru i'r rhain. Yn dilyn y sesiynau, cysylltwyd â'r chwe awdurdod lleol arall drwy neges e-bost er mwyn eu hysbysu eto bod modd iddynt gyfrannu at y broses, ond ni chafwyd ymateb gan yr un ohonynt.

Cyfrannodd tua 50 o ofalwyr plant o bob cwr o Gymru eu barn ar Sicrhau Ansawdd trwy gyfres o sesiynau mewn digwyddiadau ymgynghori, grwpiau gofal plant, nosweithiau rhwydweithio, holiaduron a chysylltiadau dros y ffôn a thrwy e-bost.

2.2 Ymgynghoriadau â phlant

Cafodd pynciau eu codi mewn ffordd wahanol, yn briodol i oedran a cham datblygu'r plant a oedd yn bresennol. Rhoddwyd gwybodaeth am y sesiynau a gynhaliwyd i rieni'r plant a wnaeth gymryd rhan yn y sesiynau. Gofynnwyd am ganiatâd ysgrifenedig rhieni'r holl blant a wnaeth gymryd rhan yn y sesiynau a phwysleisiwyd na fyddai unrhyw sesiwn na'r plant cysylltiedig yn cael eu henwi.

2.2.1 De-orllewin Cymru (36 o blant blwyddyn chwech)

I ddechrau, gofynnwyd i blant beth oedd yn bwysig iddynt pan fyddai rhywun yn gofalu amdanynt. Buont yn gweithio mewn grwpiau bach o rhwng pump a chwech o blant, gan gynhyrchu map meddwl yn dangos eu barn. Mae canfyddiadau hyn yn cael eu trafod yn y pwyntiau allweddol o'r ymgynghoriadau â phlant yn adran 3.4.

Defnyddiwyd gweithgaredd 'graddio diemwnt' fel ail weithgaredd gyda'r grŵp hwn o blant. Rhoddwyd 9 datganiad yn ymwneud ag elfennau o ddarpariaeth gofal plant i'r plant hyn, a gofynnwyd iddynt eu graddio gan ddefnyddio siart graddio diemwnt. Rhoddwyd 9 datganiad amrywiol a ddaeth o restr o 36 datganiad, y gellid eu grwpio yn ôl elfennau hyfforddi, rhinweddau personol y

gofalwr, datblygiad emosiynol a lles plant ac amgylchedd y lleoliad. Eto, mae canfyddiadau'r gweithgaredd hwn yn cael eu trafod yn adran 3.4.


3.4 Ymgynghoriadau â phlant

3.4.1 Ymgynghoriad â Phlant De Cymru

Cynhaliwyd yr ymgynghoriad hwn mewn ysgol gynradd yn y de-orllewin, gyda 36 o blant o flwyddyn chwech (rhwng 10 ac 11 oed) a oedd wedi cael profiadau amrywiol o ofal plant.

Roedd yr elfennau a ystyriwyd bwysicaf gan y plant a wnaeth gymryd rhan yn ddatganiadau sy'n gallu cael eu cysylltu ag amgylchedd y lleoliad a datblygiad emosiynol a lles plant. Roedd y rhain yn cynnwys cadw plant yn ddiogel, peidio â gwahaniaethu, gwybod beth roedd y plant yn ei hoffi neu'n ei gasáu a chael cartref glân.

3.4.2 Amlygwch un pwynt sy'n bwysig i chi pan fydd rhywun yn gofalu amdanoch chi (36 o blant)



3.4.3 Pwyntiau allweddol o'r ymgynghoriad â phlant yn Ne-orllewin Cymru

- Roedd cadw plant yn ddiogel yn bwysig iawn i blant yn y grŵp hwn ac roeddent wedi crybwyll hyn mewn trafodaethau yn ystod pob

gweithgaredd. Roeddent yn trafod diogelwch o safbwynt nodweddion diogelwch fel clwydi ar gyfer grisiau, cymryd risgiau ac ati, a diogelwch personol yn gysylltiedig â bwlio a cham-drin. Roedd y plant yn llafar iawn ynghylch rhannu pwysigrwydd yr agwedd hon.

- Thema gyffredin arall oedd gallu chwarae yn yr awyr agored a chael offer tu allan; roedd gemau a chwaraeon a lle i chwarae oll yn nodwedd amlwg o drafodaethau.
- Roedd lleoliad glân yn bwysig i fwyafrif y plant a oedd yn bresennol ac roedd rhai plant hefyd yn rhoi pwys ar beth fyddai barn eu rhieni pe na bai'r lleoliad yn lân.
- Roedd mynediad at offer TG a gemau cyfrifiadurol yn bwysig i nifer o blant, sy'n adlewyrchu'r symud tuag at dechnoleg.
- Ystyriwyd bod cael ffrindiau yn y lleoliad yn bwysig ac roedd bod yn hapus yno wedi cael ei amlygu'n agwedd allweddol arall.
- Perthynas glòs; roedd rhai o'r ymatebion unigol gan blant wrth drafod hyn yn gysylltiedig â chreu perthynas glòs rhwng plant a'r gofalwr plant. Roedd hyn yn cynnwys:

'Mae angen i chi gael amser i greu perthynas glòs â nhw, dydych chi ddim yn mynd i fynd i dŷ rhywun a bod yn hapus' (Rhian, 10 oed).

'Mae'n rhaid i chi wneud yn siwr eu bod nhw'n gofalu amdanoch chi oherwydd os ydyn nhw'n gofalu am bawb arall yn lle hynny, gallech chi deimlo'n unig' (Kingsley, 10 oed)

Mae hyn yn dangos pwysigrwydd cael plant i setlo hyd yn oed pan fyddant yn hŷn. Bydd babanod fel arfer yn cael cyfnodau i setlo ond yn aml, rhagdybir nad oes angen hyn ar blant hŷn. Hefyd, mae'n dangos pwysigrwydd cymarebau mewn lleoliad a bod gofaluwr plant yn cael amser i feithrin perthynas glòs gyda'r plant.